

Ulluunerani paaqqinnittarfinni tamani inimi ataatsimi atorfiit akuerisaasut minnerpaamik sisamangortinneqarnerisigut aningaasatigut, allaffissornikkullu kingunissaanik ersarissaasumik nassuiaasiornissaannik, Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Olsen, Demokraatit)

Akissuteqaat

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalackersuisoq)

Aappassaaneerneqarnera

Naalackersuisut Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliaq siunnersuummik suliarinninneranut kiisalu ataatsimiitaaliap oqaaseqaateqarneranut qujassuteqarfigaat.

Maluginiarneqarpoq ataatsimiititaliami amerlanerussuteqartut siunnersuutip akuersissutigineqarnissaa inassutigigaat, aammalu ulluunerani paaqqinnittarfiit sinaakkutaat pillugit siunissami oqallinnernut paasissutissanik tunngavissaqarluarnermik qulakkeerinninnissamut politikikkut annertoorujussuarmik tapersersorneqartoq.

Nalilerneqarpoq minnerpaaffissatut sulisoqalersitsinerup atuutilersinneqarnissaanut atatillugu aningaasaqarnikkut allaffissornikkullu kingunerisassat pillugit nassuiaat suliamik ingerlatitseqqinnermi attuumassuteqartumik tunngavissatut atorqearsinnaasoq, ilaatigut sulisut amigaataanerat, sulisussarsiornermi sulisoqaannarnissamilu ajornartorsiutit qitiusut kiisalu kommunit akornanni illoqarfiit nunaqarfiillu assigiinngissutaasa erseqqissarneqarnissaat ilanngullugit.

Ataatsimiititaliap nassuiaammut qitiutinneqartussat arlallit inassutigai. Soorlu ilaatigut akissarsianut atorfeqarnermullu atugassarititaasut, kommuninut tapiissutinik annertunerulersitseratarsinnaanermut pisariaqartitsineq, sulisunik utoqqaanerusunik peqataatitsilernermi isiginnittaatsit, sulisussarsiornermut attassiinnarniarnermullu tunngatillugu qaangerniagassat aamma illoqarfiit nunaqarfiillu akornanni atugassarititaasut assigiinngissusaat. Suleriaqqinnermi sammisat taakku tamarmik ilaasussat pingaaruteqarput.

Peqatigisaanik erseqqissaatigineqarpoq ulluunerani paaqqinnittarfinnut suliassaqarfik kommunit akisussaaffeqarfigigaat, kiisalu sulisulersuinermi kommunit qanimut suleqatigalugit allannguutit aatsaat piviusunngortinneqarsinnaasut.

Taamatut oqaaseqarlutik Naalackersuisut siunnersuutip aappassaaneerneqarnissaanut sukumiinerusunik oqaaseqaateqarlutik saqqummiuppaat.